



## GHJASEPPA DI SCANU

1

### **Caru lettóri lu 'nfadu paldona E pòniti di bona 'ulintài**

Chi éu ti presentu una canzona  
Chi ti faci sapé lu chi no sai  
Sólu di la Gaddhura si rasgiòna  
Di li custumi di l'antichitài  
E tu no sai chi candu sé' natu  
Éra dugna costummu cambiàtu.

2

Candu sòcu nat'èu la Gaddhura  
Éra tutta frunìta di lignamu  
Licci e litarru e alta alburatura  
E irrìcca di beddhu bistiàmu  
Capri, pécuri, polci a truvatura  
Chiss'éra lu só' 'ittu e lu só' sbramu  
E bistiàmu più grossu dapói  
Asini rudi, èbbi, vacchi e bói.

3

Dapói pasculendi unu unde l'altu  
Tutti parìa ch'érani patròni  
Ch'érani li campagni a camp'abbaltu  
E no ci'aia pruibbiziòni  
Éra la cumunella chena scaltu  
No isistia cuntravvinziòni  
E li passòni pa' no istà fóra  
Aiani pinnètti e cònci ancóra.

4

Ancóra si cussì mali stagghjani  
Érani sani e netti di pinséri  
Li stegli daparèddhi si faciàni  
Padéddhi manni, cuncòni e taddhéri  
E chì magnàani e cun chissi cuciani  
Li truddhi d'òssu pa' esse licéri  
Usàani 'ulintéri e pa' aòrru  
Puru fulchetti di lignu e di còrru.

5

Truddhi di còrru a bì lu misciuratu  
Maccàri chi no érani tant'ùmbuli  
E pa' la iotta aian'invintatu  
Truddhòni manni chjamati chjarùmbuli  
Chiddhi padéddhi cu' l'óciu cagghjàtu  
Pariani cuili di culùmbuli  
Da chjarùmbuli a sestu di lacchèddhu  
Cantu 'òlti agghju bitu sèndi stéddhu.

6

Unu strumpéddhu di piru scàatu  
Li silvia di scólu e di scudéddha  
Lu laldu éra lu pastu più usatu  
Insèmb'a còccu di la canistréddha  
Cantu 'òlti ancór'èu agghju magnatu  
In taddhéri, in cuncòni e in padéddha  
E no mi si ribéddha manc'abàli  
Maccàri sia laldu di mannàli.

7

Érani gali pa' la pulizia  
Pòari e irricchi senza diffarènzia  
L'unu di l'altu no si nni ridia  
Ch'érani tutti illa stessa cadènzia  
Dugnumu la só' mola in casa àia  
E lu tilagghju a cunviniènzia  
La scadènzia sólu éra lu pani  
Palchì pòcu la tarra cultivàani.

8

S'adducàani un pocu di farina  
Illu branu pa' fà la mazzafriusa  
Di lu còccu éra pòcu la bulghina  
A lald'e carri, la 'ita éra chissa  
Dugna di cuminciàani da matina  
A magnà carri e la fami éra chissa  
Chissa éra la bundànzia cumuna  
Laldu e carri e lu più carri capruna.

9

A la diùna chiddhu laldu gròssu  
Ci parìa lu pastu più sanu  
A cumpànicu cogghju a più no pòssu  
Taddhènd'a pezzi manni a palt'in manu  
Senza calzàri e senza pann'in dossu  
Sempri infattu a la ròbba pianu pianu  
E illu branu latti cu' lu séru  
Chèna còccu pa' nuddha e chiss'è véru.

10

Mi nn'amméru ancór'eu illu pinsàni  
Comu sò chiddhi tempi cambiàti  
Tutti da unu stègliu éra a magnàni  
Innant'a chiddhi tràppuli pusàti  
E si làaani pòcu cara e mani  
Tenamènt'a viné li timpuràti  
Érani abbittuati a chissu 'èssu  
Li chi s'érani avvisti in chissu 'ngrèssu.

11

Intarèssu n'aiani bundanti  
Sibbè chi tandu nuddha si 'alia  
Lu chi vindia bè bói pisanti  
Vinti scudi lu pagghju li dagghjia  
Ma éra lu dinàni bè fruttàti  
Chi né tassi e né lussu no ci àia  
Si 'istiani tutti chèna spési  
Chi tissiani tutti linu e frési.

12

Dugna mési no éra a cambiàssi  
La camìsgia manc'unu in mez'a middhi  
No àiani l'usu di laàssi  
E né di fiaccàssi li capiddhi  
Siccòmu no ci àia lussu e tassi  
Tuttu lu chi buscàani éra par'iddhi  
C'érani chiddhi spèlti mintuàti  
Pal dónu di nattura scinzieràti..

13

E érani aggalàti possu d'ivvi  
Li paréti illu fassi un beddhu cóiu  
C'érani ancóra li 'endicativvi  
Pal pudé vindicà lu sangu sóiu  
C'érani chiddhi spèlti e chiddh'attivi  
Chi piddhàani unu stazzu par un bóiu  
Si un cóiu faciàni aggalàtu  
Lu 'ntarèssu no éra calculàtu.

14

Abàli è cambiata dugna cosa  
Chi lu chi faci l'òmu è lu 'ntarèssu  
Lu ch'è irriccu magna e si ripòsa  
E no piddda li cosi a lu rièssu  
È di lu lussu criscèndi la dòsa  
Indugna lócu à presu pussèssu  
È lu 'ntarèssu lu chi faci l'òmu  
E più no v'à e né chi e né còmu.

15

Cu' abàli no v'è lu paragòni  
Ógghji la 'jenti à àutu lu rimbussu  
Ci sò li scóli pa' dà liziòni  
La 'ndustria di l'òmu è sempr'in cussu  
Da chiddhi còncchi. Pinnètti e cupòni  
Ógghji sò cas'e palazzi di lussu  
Illu discussu di chist'algumèntu  
Cèltu no mi daréti cridimèntu.

16

Candu m'ammèntu comu ci ammannàami  
A lamintassi abàli è un abbùsu  
Isulzi e nudi e murèndi di fami  
Pocu puliti cunfòlm'éra l'usu  
La notti innantu a un sùaru culcàami  
Cu' lu gabbànu sólu a volti infùsu  
E c'éra l'usu ancóra di furà  
Pòlci grassi cun laldu di magnà.

17

Vi pudéti cuntà affultunati  
La ciuintùra chi séti lu pernu  
Voi gudendi vi sét'ammannàti  
Chi séti nati illu mundu mudernu  
Piùpprestu li tass'àn'aggravatu  
E lu più vi llu piddha lu governu  
In un tempu modernu undi la legghji  
Troppu cu' irrigóri vi curregghji.

18

No sò falzi pruegghji véru è  
Chi la 'ita d'abàli è un onori  
La tarr'ogghj pruduci dugna bè  
Ch'è cultivata da l'agricultori  
Òlt'e vign'e cialdini tutt'e tre  
Dani frutti più di lu laóri  
Lu Signóri pudéti ringraziàni  
Chi vi nutriti di 'inu e di pani.

19

Li cristiani abàli sò nutriti  
Di pulizia, di pani e di 'inu  
Èu agghju cunnisciutu li banditi  
Chi ci nn'aia di dugna 'icinu  
Cun chiddh'almi chi abà sò pruibbìti  
Alchibùsu, cultédh'e ispadinu  
E un cuntinu la 'inditta c'éra  
Chi n'andàa a lu 'mpiccu e in galéra.

20

E c'éra l'usu di l'innimmistài  
Com'érani li 'Asa e li Mamìa  
Tutti aunìti senza pietài  
Una parét'a l'alta pissighìa  
Settant'òmini molt'in dugn'età  
Una fèmina ancóra vi pirìa  
Li Mamìa e li 'Asa a boci manna  
Pal vindicass'abbrisini la 'janna.

21

E frati Sanna cu' li Piumédhhi  
La fésin'accanita la campagna  
Li Capriòni uniti e li 'Jachédhhi  
Li Tanca, li Maiòlca e li Bisagna  
Tutti arruganti, tòliti e irribédhhi  
La paci li parìa cosa stragna  
La campagna la fésin'accanita  
Paricchji vi punìsini la 'ita.

22

No ci passàa chita di lu mesi  
Senz'una nuitài aguniósa  
Li pastóri cu' li luchisantési  
Un'alta innimmistài rigurósa  
No possu divvi cant'anni durési  
L'ammazzamèntu e ghjenti luttuósa  
Ghjenti 'judiziósa a tempu faci  
Cun bon'accòldi pa' punill'in paci.

23

Mi dispiaci chi vi 'ó tropp'accia  
A divvi chisti cosi chi sòcu éu  
Fрати Buddhòni cun frati Capaccia  
Un'alta innimmistài in tempu méu  
Pal tant'anni durési la malaccia  
Digna di un véru populu 'judéu  
Éu agghju cunnisciutu l'arruganti  
Chi pariani razza di briganti.

24

Li bilbanti ci sò ancóra abàli  
Fèndi lu dann'a lu contrapaltitu  
Parò siddhu si próan'a fà mali  
Tutt'è sigrettu com'è pruibbitu  
Ch'ogghji la legghji è tantu puntuali  
Chi candu v'è la próa unu è punitu  
Vèni culpitu da la disciplina  
O lu manda in galéra o lu cunfina.

25

Abàli si camìna illu stradòni  
Ottocarri, ottomobbili e vetturi  
S'anda illu trenu indrent'a li vagòni  
Chi no l'offèndi mancu la 'nfusùra  
Da innanzi li pòari passòni  
Li tuccàa d'andà a disvintura  
Da la Gaddhura a Cagliari'a cabaddhu  
Cun prìculu di 'ita e di trabaddhu.

26

A cabaddhu ghjumpàami rii e vèni  
E fangu chi di 'arru ci nn'aia  
Ci tuccàa a ghjumpà irrii pieni  
Cun prìculu di mòlti e ni muria  
In cambiu abà ci sò li trèni  
Vittùri beddhi in dugna simmitria  
Tandu no c'era in fini di li cònti  
In tutta la Gaddhura mancu un ponti.

27

Li cònti di l'antichi l'éti intési  
L'occiòni'a divilla m'ubbrica  
Com'érani li pòari gaddhurési  
Abbandunati a chiddha legghji antica  
Abàli andèmu a tutti li paési  
Pusàti senz'aé nisciun fatica  
La mod'antica abà intés'aéti  
Cosa chi no sapiati sapéti.

No v'appaltéti da la 'ita bona  
Ch'è una 'ita di felicitai.

***Caru lettóri lu 'nfadu paldòna  
E pòniti di bona 'ulintài.***

Progèttu:

**“ÉU FAÉDDHU GADDHURÉSU”**

Finanziàtu da la Legghji 482 di lu 1999, alticculi 9 e 15 e Legghji Regionali 22 di lu 2018 – annualitài 2021